



MOD.100-2/1/2 Jld 6 ( ) 05/06

**LAWATAN KERJA TIMBALAN MENTERI PERTAHANAN KE KAWASAN TANGGUNGJAWAB (KTJ) OP PASIR SEKTOR BRAVO, PULAU BERHALA DAN MARKAS WILAYAH LAUT 2, SANDAKAN, SABAH**

1. **SANDAKAN, 17 Jun 2024** - Timbalan Menteri Pertahanan, **YB Adly bin Zahari** telah melaksanakan Lawatan Kerja ke Kawasan Tanggungjawab (KTJ) OP PASIR Sektor Bravo, Pulau Berhala dan Markas Wilayah Laut 2 (MAWILLA 2), Sandakan, Sabah. Lawatan kerja di Pulau Berhala ini adalah bertujuan untuk mendapatkan gambaran yang lebih jelas dan terperinci mengenai aspek pengoperasian sempadan selain melihat sendiri keperluan dan kebajikan anggota yang bertugas di sempadan.
2. Timbalan Menteri Pertahanan dan delegasi telah memulai pergerakan dengan menaiki bot dari Jeti MAWILLA 2 dan ketibaan beliau bersama delegasi telah disambut oleh warga Markas Taktikal Pulau Berhala. YB Adly dan warga Angkatan Tentera Malaysia (ATM) seterusnya telah bersama-sama menunaikan Solat Sunat Aidiladha di Surau Al Jamaei, Kem Pulau Berhala.
3. Seusai solat, Timbalan Menteri Pertahanan dan delegasi telah dibawa ke Markas Taktikal Pulau Berhala untuk menyantuni warga ATM yang bertugas sempena Majlis Ramah Mesra dan Jamuan Aidiladha bagi menzahirkan penghargaan terhadap pengorbanan perwira dan perajurit ATM yang bertugas di perbatasan pada perayaan kali ini. Dalam kesempatan itu juga, Timbalan Menteri Pertahanan berbesar hati menyampaikan sumbangan 10 Kotak Makanan beserta daging sembelihan korban kepada Pegawai Memerintah Batalion Kelima Rejimen Renjer Diraja (5 RRD) iaitu Leftenan Kolonel Chai Kean Seng.
4. Sempena lawatan ulung Timbalan Menteri Pertahanan ke Markas Taktikal Pulau Berhala ini, beliau turut diberikan taklimat berkaitan pelaksanaan OP PASIR yang dilaksanakan dalam melindungi kedaulatan dan keutuhan wilayah negara dari sebarang bentuk ancaman pencerobohan dan konflik selain berpeluang meninjau keadaan persekitaran dan kemudahan prasarana yang disediakan di kem ini.
5. Setiba semula di MAWILLA 2, Timbalan Menteri Pertahanan meneruskan lawatan kerja beliau dengan melakukan tinjauan terhadap perkembangan terkini Projek Naik Taraf Jeti Operasi MAWILLA 2. Selesai tinjauan, YB Adly telah berbesar hati menyempurnakan penyembelihan korban dua ekor lembu yang disumbangkan oleh beliau dan turut tidak melepaskan peluang menghadiri Majlis Ramah Mesra dan Jamuan Aidiladha bersama warga MAWILLA 2.

6. Majlis ini diserikan lagi dengan penyampaian bantuan kebajikan kepada 10 orang penerima dari kalangan anggota atau waris yang menghidap penyakit kronik atau kurang upaya (OKU). Sumbangan yang disalurkan ini mencerminkan keprihatinan dalam membantu meringankan beban warga TLDM dalam pengurusan kehidupan seharian. Siri lawatan kerja Timbalan Menteri Pertahanan di MAWILLA 2 diakhiri dengan sesi taklimat operasi oleh pihak Markas.
7. Lawatan Kerja ini adalah merupakan salah satu inisiatif Timbalan Menteri Pertahanan dalam menyantuni warga ATM yang sedang melaksanakan operasi di bawah Tonggak Pertama Strategi Pertahanan Negara iaitu Cegah Rintang Berpadu selaras Kertas Putih Pertahanan (KPP). Strategi ini bertujuan melindungi kepentingan negara dari sebarang ancaman oleh anasir yang ingin menggugat kesejahteraan negara.
8. Turut hadir sewaktu kelangsungan Lawatan Kerja dan Majlis Ramah Mesra Aidilfitri ini adalah Panglima Armada Timur; Laksamana Madya Datuk Haji Muhammad Ruzelme bin Haji Ahmad Fahimy, Panglima Wilayah Laut 2; Laksamana Muda Dato' Khir Junaidi bin Idris, Ketua Staf Markas Angkatan Bersama; Mejar Jeneral Dato' Haji Fazal bin Haji Abdul Rahman, Komander Markas Angkatan Tugas Bersama 2; Brigedier Jeneral Wan Edenin bin Wan Mahsin, Timbalan Panglima Wilayah Laut 2; Laksamana Pertama Muhamad Shakir bin Salleh, Pegawai-pegawai Kanan ATM serta warga ATM khususnya dari MAWILLA 2 dan sekitar Sandakan.

**-TAMAT-**

**“MALAYSIA MADANI”**

**“BERKHIDMAT UNTUK NEGARA”**

**“PERTAHANAN NEGARA, TANGGUNGJAWAB BERSAMA”**

---

**Kementerian Pertahanan Malaysia  
Dikeluarkan pada 17 Jun 2024**